

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Muzannin Wever di fraccion Futuro elegi como vice presidente di Parlamento di Aruba

Ayera mainta den Parlamento di Aruba a tuma luga reunion publico number 17 durante cual 18 miembro di parlamento a vota pa e vice presidente nobo di Parlamento di Aruba pa resto di e periodo 2024-2025.

Manera ta conoci votacion ta ser realisa den dos tanda. Durante e prome tanda ta vota pa e prome nomber cu parlamentarionan ta desea pa bira vice presidente y e prome nomber cu ta ser manda pa aprobacion di Gobernador di Aruba SE Alfonso Boekhoudt.

Durante e di dos tanda ta vota pa e di dos nomber cu ta bay pa Gobernador di Aruba, cu den caso cu e prome nomber cu a ser manda no ser aproba pa Gobernador, e di dos nomber por keda aproba como vice presidente, cual ta



algo cu en realidad no sa pasa.

E comision cu a keda encarga cu conteo di e votonan tabata consisti di parlamentario Mike de Meza di AVP cu tabata presidente di e comision y Ruthlyn Lindor (Futuro) y Otmar Oduber (PPA) cu a ser nombra miembronan di e comision aki.

Durante e prome tanda di votacion Muzannin Wever di fraccion Futuro a sali victo-

rioso cu 12 voto, Gino Goeloe di fraccion Futuro a haya cinco voto y Mike de Meza di fraccion AVP a haya un voto.

Durante e segunda tanda di votacion Ruthlyn Lindor di fraccion Futuro a haya 12 voto, y bira e di dos nomber cu ta ser manda pa Gobernador di Aruba, y Gino Goeloe, tambe di fraccion Futuro, a haya seis voto.

Diahuebs atardi tambe a

tuma luga e votacion pa presidente di parlamento. Manera ta conoci despues di resultadonan di eleccion, durante e prome votacion pa presidente di parlamento di e constelacion nobo, Gerlien Croes, lider di partido Futuro a keda eligi como presidente di parlamento y Melvin Wyatt-Ras como vice presidente di parlamento.

Como cu ambos, Croes y Wyatt-Ras, ta forma parti di Gabinete AVP-Futuro, parlamento a vota pa e presidente nobo pa e resto di aña parlamentario 2024-2025.

Durante e prome tanda di votacion, e prome nomber pa presidente di parlamento, Sneek a sali victorioso cu 13 voto na favor y parlamentario Hendrick Tevreden di fraccion MEP a haya ocho voto.

Den e di dos tanda di vo-



tacion, pa scoge e di dos nomber pa presidente di parlamento, parlamentario Jennifer Arends-Reyes di fraccion AVP a ricibi 13 voto, Shailiny Tromp-Lee di fraccion MEP a ricibi siete voto y Hendrick Tevreden a haya un voto.

E dos nombrenan cu lo ser manda pa Gobernador di Aruba SE Alfonso Boekhoudt ta di Marlon Sneek y Jennifer Arends-Reyes.

Parlamento di Aruba a continua cu tratamiento di presupuesto nacional 2025

Ayera merdia Parlamento di Aruba continua cu tratamiento di e presupuesto nacional 2025. Manera ta conoci e tratamiento di presupuesto a cuminsa dia 7 di maart, pero a keda rapidamente suspendi despues cu fraccionnan AVP y Futuro a entrega nan amienda pa asina manda esaki pa e organonan consultativo pa conseho.

Despues di huramentacion di parlamentarionan nobo y di Gabinete AVP-FUTURO, trabou a cuminsa di biaha ya cu ayera merdia parlamento a continua cu tratamiento di presupuesto nacional 2025.

E presion ta un poco pisa teniendo na cuenta cu pa ayera mes mester a trata y aproba e presupuesto den su totalidad ya cu 31 di maart, fecha deadline pa trata y aproba presupuesto ta eyan mes, dialuna pa ta exacto.

Manera ta conoci tabatin un tardansa pa por a cuminsa cu tratamiento di presupuesto. Esaki a trece preocupacion pa e Colegio di Supervision Financiero di Aruba (CAft) ken pa motibo di e tardansa pa trata e presupuesto a manda un carta di aviso pa parlamento y pa gobierno, pidiendo atencion pa trata e presupuesto, prome cu 31 di maart.

Como cu CAft no a haya un contesta riba nan carta di aviso di parti di parlamento, nan a escala y a hiba esaki na Conseho di Minister di Reino cu na su turno a e instruccion na Aruba pa percura pa trata e presupuesto 2025 prome cu 31 di maart.

Aunke esaki tabata un advertencia, esaki ta algo cu no lo a trece sancion directo pa Aruba, pero si lo por tin tabatin consecuencia si no lo a sigui e instruccion di Conseho di Minister di Reino y CAft.

“Esakinan no ta sancionnan directo den e sentido cu ta alerta Conseho di Minister di Reino. Pero nan ta enberdad consecuencianan, nan ta consecuencianan y cu esey e pais na final ta haci su mes daño, pasobra mester paga mas. Bo no por refinancia e fiananan, bo no por drenta den contratonan nobo, y esey naturalmente no ta loke bo kier, y esey finalmente no ta bon pa e habitantenan di Aruba tampoco. Ya caba mi por scucha Aruba ta bisa, nos no ta haya ningun castigo di tur manera. P'esey nos mester preocupa,” presidente di CAft, Lidewijde Ongering a indica na e portal Noticia Cla anteriormente.

Parti di e tardansa pa continua cu e tratamiento di presupuesto tabata debi na cu mester a warda riba e conseho di e organonan consultativo riba e amienda entrega pa fraccionnan AVP y FUTURO. Una bes cu esakinan a keda



cla, a anuncia cu acuerdo di gobernacion a keda cla y a anuncia formacion di Gabinete AVP-FUTURO y ken ta e ministernan cu lo forma parti di e gabinete aki.

Teniendo esaki na cuenta, mester a tuma espacio pa tanto ministernan como e parlamentarionan nobo por a huramenta pa asina por a continua cu e tratamiento di presupuesto. Diahuebs mainta parlamentarionan nobo a huramenta, ayera mainta Gabinete AVP-FUTURO a huramenta y di biaha ayera merdia a tene e reunion publico pa continua cu e tratamiento di e presupuesto nacional 2025.

Manera a keda anuncia dia 7 di maart, e amienda entrega

pa fraccion AVP y FUTURO a practicamente “bolter” e direccion di e presupuesto. E cambianan mas grandi cu tin den e amienda a entre otro aumento di reparatietoeslag pa pensionadonan cu 250 florin pa luna entrante 1 di mei 2025, reduccion di accijns cu 10 cen riba gasolin entrante 1 di mei di 2025, educacion di goederen en diensten cu 10% y aumento di subsidio pa Funacion Pa Nos Comunidad na 500 mil florin.

E tratamiento di presupuesto a tuma un cantidad di ora y pa momento di cierre di nos edicion ainda e reunion publico no a termina. Keda pendiente pa lesa informacion detaya di e reunion publico den nos siguiente edicion di Bon Dia Aruba.